



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 83/23), a u vezi sa članom 61. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23 i 83/23), Visoko sudsko i tužilačko vijeće Bosne i Hercegovine je na sjednici održanoj 08.02.2024. godine, donijelo

O D L U K U o imenovanju sudije Općinskog suda u Banovićima

- I. Za sudiju Općinskog suda u Banovićima imenuje se **Čajić Sanela**.
- II. Imenovana stupa na dužnost 04.03.2024. godine.
- III. Ova odluka stupa na snagu danom donošenja i objavljuje se na internet stranici Vijeća.

O b r a z l o ž e n j e

Visoko sudsko i tužilačko vijeće Bosne i Hercegovine (u daljem tekstu: Vijeće) je dana 10.05.2023. godine, objavilo javni konkurs, broj: 04-07-3-1787-1/2023, kojim je, između ostalih pozicija, oglašena i jedna pozicija sudije Općinskog suda u Banovićima.

Nakon provedene konkursne procedure, nadležno podvijeće je izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i Poslovnikom Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na sjednici održanoj 21.12.2023. godine odlučilo da za poziciju sudije Općinskog suda u Banovićima imenuje kandidata na rang listi pod rednim brojem 4 Mehić Anesa.

Nakon imenovanja, a prije preuzimanja dužnosti, kandidat Mehić Anes je 22.01.2024. godine obavijestio Vijeće da odustaje od kandidature za navedenu pravosudnu poziciju. Dana 01.02.2024. godine, imenovani je dostavio podnesak kojim je promijenio svoje mišljenje i zatražio ponovno razmatranje njegove kandidature za navedenu pravosudnu poziciju.

Imajući u vidu navedeno, te nakon ponovnog razmatranja rang liste kandidata, Vijeće je na navedenu dužnost sudije Općinskog suda u Banovićima imenovalo drugu osobu iz grupe prijavljenih kandidata, jer prethodno imenovani kandidat na rang listi pod rednim brojem 4 Mehić Anes, iz razloga koji nisu opravdani nije preuzeo dužnost u vremenskom roku koji je odredilo Vijeće.

Upravo iz navedenih razloga, a na osnovu ovlaštenja utvrđenih članom 46. stav (2) Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 25/04, 93/05, 15/08, 48/07 i 63/23), Vijeće je na sjednici održanoj 08.02.2024. godine donijelo Odluku o poništenju odluke Visokog sudskog i tužilačkog vijeća Bosne i Hercegovine, broj: 04-07-3-4232-1/2023 od 21.12.2023. godine, objavljena na internet stranici Vijeća i broj: 04-07-3-4232-2/2023 od 21.12.2023. godine, objavljena u „Službenom glasniku BiH“, kojom je Mehić Anes imenovan na poziciju sudije Općinskog suda u Banovićima.

Vijeće je na istoj sjednici održanoj 08.02.2024. godine, u skladu sa odredbama člana 46. stav 2. Zakona o VSTV-u BiH, a u vezi sa čl. 59a., 59b., 60., 61. i 62b. Poslovnika Visokog sudskog i tužilačkog vijeća Bosne i Hercegovine ("Službeni glasnik BiH", br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23 i 83/23), za sudiju Općinskog suda u Banovićima imenovalo kandidatkinju na rang listi pod rednim brojem 6 Čajić Sanelu, koja od 01.01.2018. godine obavlja dužnost stručnog saradnika u Općinskom sudu u Tuzli. Prije toga je obavljala poslove volontera, pripravnika u JZU Klinički centar u Tuzli i Općinskom sudu u Tuzli.

Vijeće je nakon ocjene stručne sposobnosti kandidatkinje zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidatkinje, profesionalnu nepristranost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

U toku konkursne procedure, imenovana kandidatkinja je u pogledu bodova za kriterij stručnosti, ostvarila ukupno 84,5 bodova od mogućih 100 bodova, dok je na razgovoru pred nadležnom komisijom Vijeća ostvarila, ukupno 11,9 bodova od mogućih 20 bodova, što ju je u konačnici rangiralo na šesto mjesto rang liste kandidata sa ukupno ostvarenih 96,4 bodova od mogućih 120 bodova.

Osim toga, Vijeće je imalo u vidu da je imenovana kandidatkinja, u skladu sa članom 59a. stav (1) tačka a) Poslovnika VSTV-a BiH ostvarila potreban uspjeh od najmanje 95 bodova, kako bi bila predložena i imenovana na poziciju sudije općinskog suda.

Prilikom donošenja odluke, Vijeće je uzelo u obzir činjenicu da su kandidati na rang listi pod rednim brojem 1 i 5, na jednoj od prethodnih sjednica Vijeća imenovani na određene pravosudne pozicije, dok se u odnosu na kandidate na rang listi pod rednim brojem 2 i 3, Vijeće opredjelilo za kandidatkinju na rang listi pod rednim brojem 6 Čajić Sanelu, radi potrebe osiguranja adekvatne nacionalne i spolne zastupljenosti u navedenom sudu, u smislu navedenih odredaba člana 43. stav 2. Zakona o VSTV-u BiH.

Imajući u vidu odredbu člana 3. Zakona o VSTV-u BiH, Vijeće ima zadatak da kao regulatorno tijelo na nivou države vodi računa o efikasnosti i ažurnosti cjelokupnog pravosudnog sistema, čime doprinosi profesionalnom i funkcionalnom pravosuđu u interesu građana. S tim u vezi, predstojeći, objektivno postojeći rizik početka primjene Zakona o izmjenama i dopunama Zakona o VSTV-u (Sl. gl. BiH, broj: 63/23) iz odredbe člana 27. Zakona, dodatno je uticao na odluku Vijeća kojom je na poziciju sudije Općinskog suda u Banovićima imenovana kandidatkinja na rang listi pod rednim brojem 6 u odnosu na kandidata na rang listi pod rednim brojem 2, koji trenutno obavlja dužnost sudije osnovnog suda.

Naime, faktičkim horizontalnim premještanjem kandidata koji već obavljaju funkciju redovnog sudije, Vijeće bi zanemarilo regulatornu ulogu i ovlaštenje za osiguranje efikasnosti i ažurnosti pravosudnog sistema. Ovo iz razloga što je u skladu sa odredbom člana 22. Zakona o izmjenama i dopunama Zakona o VSTV-u BiH, kojom se u Zakon o VSTV-u BiH dodaje odredba člana 86b. stavak (5) propisano da: „prvo imenovanje i napredovanje predstavljaju kriterij rizika po osnovu kojeg je potrebno izvršiti dodatne provjere po službenoj dužnosti u skladu sa članom 86c. stav (4) do (8) Zakona o VSTV-u BiH“, a što u vezi sa odredbom člana 22. Zakona o izmjenama i dopunama Zakona o VSTV-u kojom se dodaje odredba člana 86d. stav (6) u Zakonu Vijeću, kojom je propisano: „ako se u vrijeme provođenja postupka vrši prvo imenovanje ili napredovanje na poziciju u pravosuđu [...] odgađa se stupanje na funkciju imenovanog nositelja pravosudne funkcije do okončanja dodatne provjere s pozitivnim ishodom, a u slučaju negativnog ishoda odluka o imenovanju se poništava u skladu sa članom 44. ovog zakona“, sve zajedno podrazumijeva da je uvjet za preuzimanje dužnosti nosioca pravosudne funkcije po početku primjene Zakona o izmjenama i dopunama Zakona o VSTV-u BiH okončanje postupka dodatne provjere izvještaja o imovini i interesima. Objektivno postojeća posljedica Zakonom propisanog roka za početak primjene

Zakona o izmjenama i dopunama Zakona o VSTV-u BiH, koja je van domašaja subjektivnog uticaja Vijeća, podrazumijeva da se, nezvano za ažurnost i efikasnost postupanja Vijeća, do početka primjene Zakona o izmjenama i dopunama Zakona o VSTV-u BiH, ne mogu blagovremeno stvoriti preduvjeti za preuzimanje dužnosti nosioca pravosudne funkcije za imenovanja koja će biti provedena po odredbama novousvojenih izmjena i dopuna Zakona. Zbog toga, sva imenovanja koja će biti provedena po početku primjene Zakona o izmjenama i dopunama Zakona o VSTV-u BiH, će biti odgođena za preuzimanje dužnosti, do sticanja Zakonom propisanih uvjeta za funkcionalan početak rada Odjela za provođenje postupka po izvještajima iz člana 22. Zakona o izmjenama i dopunama Zakona o VSTV-u BiH kojim se dodaje odredba člana 86f. Zakona o VSTV-u BiH. Imajući u vidu da je riječ o budućem događaju, neizvjesnog roka, koji ne ovisi o ažurnosti Vijeća, to se Vijeće rukovodilo obavezom sistemskog rukovođenja pravosudnim sistemom, na način kojim se osigurava funkcionalnost suda za koji se imenovanje provodi, ali i održavanja funkcionalnim preostalih sudova, u specifičnoj situaciji iznimnih normativnih okolnosti.

Imajući u vidu sve iznesene razloge, Vijeće je odlučilo kao u izreci ove odluke.

Broj: 04-07-3-677-1/2024
Datum: 08.02.2024. godine



